

07

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17), a u vezi sa članom 81. stav (3) Zakona o izvršenju Budžeta Tuzlanskog kantona za 2024. godinu („Službene novine Tuzlanskog kantona“, broj: 3/24), Vlada Tuzlanskog kantona na sjednici održanoj dana 26.03.2024. godine, d o n o s i

O D L U K U

o utvrđivanju uslova, kriterija i postupka za raspodjelu sredstava sa potrošačke jedinice 32010004 – Podrška mladima u 2024. godini

Član 1.

(Predmet)

(1) Ovom odlukom utvrđuju se uslovi, kriteriji i postupak raspodjele sredstava sa potrošačke jedinice 32010004 – Podrška mladima u iznosu od 844.000,00 KM (slovima: osamstočetrdesetčetirihiljade i 00/100 KM).

(2) Sredstva iz stava (1) utvrđena su u 32. razdjelu Budžeta Tuzlanskog kantona za 2024. godinu, glava 01, potrošačko mjesto 0004 – Podrška mladima, ekonomski kod:

- a) 613900 - Ugovorene i druge posebne usluge u iznosu od 15.000,00 (slovima: petnaesthiljada i 00/100 KM),
- b) 614200 - Tekući transferi pojedincima u iznosu od 399.000,00 (slovima: tristodevedesetdevethiljada i 00/100 KM),
- c) 614300 - Tekući transferi neprofitnim organizacijama u iznosu od 430.000,00 (slovima: četiristotrideseethiljada 00/100 KM).

Član 2.

(Dodjela sredstava)

(1) Sredstva iz člana 1. stav (2) tačka a) ove odluke dodjeljuju se dobavljačima koji će pružati ugovorene i druge posebne usluge po postupku javne nabavke koju provodi Ministarstvo za kulturu, sport i mlade Tuzlanskog kantona (u daljem tekstu: Ministarstvo).

(2) Sredstva iz člana 1. stav (2) tačka b) ove odluke dodjeljuju se fizičkim licima starosne dobi od navršениh 18 godina do navršениh 35 godina života u trenutku podnošenja prijave, sa prebivalištem na području Tuzlanskog kantona u daljem tekstu: Kanton).

(3) Sredstva iz člana 1. stav (2) tačka c) ove odluke dodjeljuju se omladinskim udruženjima sa sjedištem na području Tuzlanskog kantona (u daljem tekstu: omladinska udruženja), Vijeću mladih Investicijskoj fondaciji IMPAKT i udruženjima i fondacijama (u daljem tekstu: nevladinim organizacijama) za projekte namijenjene mladima koji proizilaze iz Strategije prema mladima Tuzlanskog kantona 2020-2024. i Strategije razvoja Tuzlanskog kantona 2021-2027. godine.

Član 3.

(Namjena sredstava)

(1) Sredstva iz člana 2. stav (1) ove odluke namijenjena su za pripremu TV emisija o mladima, izradu brošura i drugih informativnih letaka za mlade, edukaciju vijeća mladih i omladinskih organizacija u svrhu jačanja njihovih kapaciteta, provođenje aktivnosti mladih, te za promociju projekata kojima se unapređuje položaj mladih na području Kantona.

(2) Sredstva iz člana 2. stav (2) ove odluke su namijenjena za:

- a) subvencioniranje kamata namjenskih kredita za stambeno zbrinjavanje mladih,
- b) subvencioniranje troškova mladima za smještaj i boravak djece u predškolskim ustanovama.

(3) Sredstva iz člana 2. stav (3) ove odluke su namijenjena za:

- a) finansiranje i sufinansiranje projekata omladinskih udruženja koji će imati za cilj unaprjeđenje položaja mladih i jačanje omladinskog aktivizma u Kantonu,
- b) rad Vijeća mladih Kantona u smislu izvršavanja obaveza propisanih Zakonom o mladima Federacije BiH („Službene novine FBiH“, broj: 36/10) a koje se odnose na plaćanja prikladnog prostora za mlade, rad sa mladima i omladinske aktivnosti, kao i osiguranje plaćanja troškova njegovog održavanja, te angažman ili stipendiranje lica zaduženog za rad i funkcionisanje prostorija Vijeća mladih Kantona,

- c) Investicijskoj fondaciji "Impakt" za program "IMPAKT inkubatori poslovnih ideja na području Tuzlanskog kantona" za realizaciju i dalji razvoj programa podrške poduzetništvu na području jedinica lokalne samouprave Tuzlanskog kantona koje su iskazale interes za saradnju, a sa ciljem očuvanja postojećih poduzetnika te pružanja podrške samozapošljavanju nezaposlenih mladih lica odnosno osnivanju i radu njihovih poslovnih subjekata,
- d) finansiranje i sufinansiranje projekata nevladinih organizacija za projekte iz Strategije prema mladima Tuzlanskog kantona 2020.-2024. i Strategije razvoja Tuzlanskog kantona 2021-2027. godine, a u cilju ostvarenja politika prema mladima, strategije prema mladima i programa djelovanja za mlade, a u skladu sa potrebama i problemima mladih.

Član 4. **(Uslovi)**

(1) Uslovi koje podnosilac prijave za dodjelu sredstava iz člana 3. stav (2) tačka a) ove odluke mora ispunjavati su:

- a) da nije mlađi od 18 niti stariji od 35 godina života u trenutku podnošenja prijave, odnosno da danom podnošenja prijave ima navršenih 18 godina starosti odnosno da nije navršio 35 godina života,
- b) da je državljanin Bosne i Hercegovine,
- c) da ima mjesto prebivališta na području Kantona,
- d) da je zaključio notarski obrađen ugovor o kupoprodaji stana ili kuće do dana podnošenja prijave,
- e) da prvi put rješava stambeno pitanje kupovinom nekretnine koja je predmet kupoprodajnog ugovora,
- f) da ima prijavljeno prebivalište na adresi nekretnine koja je predmet kupoprodajnog ugovora (izuzetak su nekretnine u izgradnji),
- g) da je nosilac namjenskog kredita po osnovu Ugovora sa bankom o namjenskom stambenom kreditu,
- h) da do momenta podnošenja prijave ima urednu otplatu kredita prema Planu otplate,
- i) da u prethodnoj godini nije bio korisnik sredstava za stambeno zbrinjavanje i/ili subvencioniranje kamata za stambeno zbrinjavanje odobrenih iz Budžeta Kantona, izuzetno u slučaju nedovoljnog broja prijava koje zadovoljavaju uslove iz odluke sredstva se mogu dodijeliti podnosiocima prijava koji su u 2023. godine bili korisnici sredstava za subvencioniranje kamata na kredite za stambeno zbrinjavanje mladih iz Budžeta Kantona.
- j) da u 2024. godini nije bio korisnik sredstava za stambeno zbrinjavanje i/ili subvencioniranje kamata za stambeno zbrinjavanje odobrenih iz budžeta drugih nivoa vlasti, izuzev u slučaju nedovoljnog broja prijava koje ispunjavaju uslove iz odluke sredstva se mogu dodijeliti podnosiocima prijava koji su bili korisnici sredstava za subvencioniranje kamata na kredite za stambeno zbrinjavanje mladih odobrenih iz Budžeta drugih nivoa vlasti ukoliko se subvencioniranje plaćene kamate ne odnosi na period počev od 01.06.2023. godine do 31.05.2024. godine.

(2) U slučaju zaključenog ugovora o zajedničkom stambenom kreditu prijavu može podnijeti samo nosilac kredita, a ako su više lica nosioci različitih stambenih kredita za kupovinu iste stambene jedinice prijavu može podnijeti samo jedno od njih.

(3) Uslovi koje podnosilac prijave za dodjelu sredstava iz člana 3. stav (2) tačka b) ove odluke mora ispunjavati su:

- a) da nije mlađi od 18 niti stariji od 35 godina života u trenutku podnošenja prijave, odnosno da danom podnošenja prijave ima navršenih 18 godina starosti odnosno da nije navršio 35 godina života,
- b) da je državljanin Bosne i Hercegovine,
- c) da ima mjesto prebivališta na području Kantona,
- d) da je roditelj/staratelj/zakonski zastupnik koji u domaćinstvu ima jedno ili više djece predškolskog uzrasta, a koja nisu započela obavezno obrazovanje u 2023. godini u smislu

Zakona o osnovnom odgoju i obrazovanju ("Službene novine Tuzlanskog kantona", broj 10/20, 8/21, 11/21, 22/21, 5/22, 10/22, 11/22 i 12/23) i koriste usluge predškolske ustanove koja je upisana u Registar predškolskih ustanova koje vodi Ministarstvo obrazovanja i nauke Tuzlanskog kantona,

- e) da posjeduje Ugovor sa predškolskom ustanovom za svako dijete koje koristi usluge ustanove najmanje 6 mjeseci,
- f) da do momenta podnošenja prijave nema neizmirenih obaveza prema predškolskoj ustanovi,
- g) da u prethodnoj godini roditelji/staratelji/zakonski zastupnici nisu bili korisnici sredstava za namjene finansiranja/sufinansiranja troškova smještaja i boravka djece u predškolskim ustanovama odobrenih iz Budžeta Kantona, izuzev u slučaju nedovoljnog broja prijava koje ispunjavaju uslove iz Odluke sredstva se mogu dodijeliti podnosiocima prijava koji su bili korisnici sredstava u 2023. godini za namjene finansiranja/sufinansiranja troškova smještaja i boravka djece u predškolskim ustanovama,
- h) da u 2024. godini roditelji/staratelji/zakonski zastupnici nisu ostvarili pravo na subvencioniranje troškova smještaja i boravka djece u predškolskim ustanovama putem mjesno nadležnih centara za socijalni rad i Ministarstva za rad, socijalnu politiku i povratak Tuzlanskog kantona,
- i) da u 2024. godini roditelji/staratelji/zakonski zastupnici nisu bili korisnici sredstava za namjene finansiranja/sufinansiranja troškova smještaja i boravka djece u predškolskim ustanovama odobrenih iz Budžeta drugih nivoa vlasti, izuzev u slučaju nedovoljnog broja potpunih prijava koje ispunjavaju uslove iz Odluke sredstva se mogu dodijeliti podnosiocima prijava koji su bili korisnici sredstava za namjene finansiranja/sufinansiranja troškova smještaja i boravka djece u predškolskim ustanovama iz Budžeta drugih nivoa ukoliko se plaćeni troškovi smještaja i boravka djece u predškolskoj ustanovi ne odnose na period počev od 01.09.2023. godine do 31.08.2024. godine.

(4) U slučaju da se iz istog domaćinstva subvencioniranje troškova smještaja i boravka djece u predškolskoj ustanovi traži za više od jednog djeteta prijavu može podnijeti samo isti roditelj/staratelj/zakonski zastupnik, s tim da će se raspodjela sredstava vršiti prvo za troškove za jedno dijete, a eventualno neraspoređena sredstva nakon utvrđivanja potpunosti svih pristiglih prijava po Javnom pozivu za po jedno dijete moći koristiti za troškove ostale prijavljene djece iz istog domaćinstva.

(5) Uslovi koje podnosilac prijave za dodjelu sredstava iz člana 3. stav (3) tačka a) ove odluke mora ispunjavati su:

- a) da je omladinsko udruženje upisano u spisak omladinskih udruženja jedinice lokalne samouprave sa sjedištem omladinskog udruženja na području Kantona,
- b) projekat mora osigurati implementaciju programskih ciljeva omladinskog udruženja a ne ad hoc aktivnosti,
- c) projekat se mora realizovati na području Kantona u 2024. godini,
- d) da podnosilac prijave nije dobio finansijska sredstva iz Budžeta Kantona za 2024. godinu za realizaciju tog projekta,
- e) da je podnosilac prijave opravdao namjenski utrošak ranije dodjeljenih sredstava iz Budžeta Kantona.

(6) Uslovi koje podnosilac prijave za dodjelu sredstava iz člana 3. stav (3) tačka d) ove odluke mora ispunjavati su:

- a) da je upisan u Registar udruženja ili fondacija koje vodi nadležni organ uprave,
- b) da je sjedište nevladine organizacije na području Kantona,
- c) da se projekat nalazi u Strategiji prema mladima Tuzlanskog kantona 2020-2024. ili Strategiji razvoja Tuzlanskog kantona 2021-2027. godina,
- d) da projekat osigurava implementaciju programskih ciljeva nevladine organizacije a ne ad hoc aktivnosti,
- e) da jedan od ciljeva projekta doprinos izgradnji obrazovnih, ekonomskih, socijalnih, zdravstvenih, kulturnih i drugih uslova neophodnih za unapređenje položaja mladih u Kantonu,

- f) da je usmjeren na zadovoljavanje društveno korisnih potreba mladih životne dobi od 15 do 35 godina,
- g) da je usmjeren na promovisanje omladinske inicijative i aktivizma,
- h) projekat se mora realizovati na području Kantona u 2024. godini (izuzetno prema procjeni Ministarstva moguće je da rok realizacije projekta bude duži, ali najduže do 31.03.2025. godine),
- i) da je podnosilac prijave za realizaciju projekta osigurao minimalno 30% finansijskih sredstava iz vlastitih ili drugih izvora u skladu sa finansijskim planom projekta koji kandiduje,
- f) da podnosilac prijave nije dobio finansijska sredstva iz Budžeta Kantona za 2024. godinu za realizaciju tog projekta,
- g) da je podnosilac prijave opravdao namjenski utrošak ranije dodijeljenih sredstva iz Budžeta Kantona.

Član 5.

(Kriteriji za bodovanje)

(1) Kriteriji za bodovanje i rangiranje podnosioca prijave za dodjelu sredstava iz člana 3. stav (2) tačka a) ove odluke su:

- a) broj članova porodičnog domaćinstva,
- b) imovinski census,
- c) stručna sprema,
- d) uspješni rezultati u oblasti nauke, umjetnosti, sporta i kulture.

(2) Kriteriji za bodovanje i rangiranje podnosioca prijave za dodjelu sredstava iz člana 3. stav (2) tačka b) ove odluke su:

- a) broj djece predškolskog uzrasta koja koriste usluge predškolske ustanove,
- b) broj članova porodičnog domaćinstva
- c) imovinski census,
- d) samohrani roditelj/staratelj/zakonski zastupnik.

(3) Kriteriji za bodovanje i rangiranje podnosioca prijave za dodjelu sredstava iz člana 3. stav (3) tačka a) i d) ove odluke su:

- a) kvalitet projekta,
- b) referense podnosioca prijave i dosadašnje iskustvo u radu sa mladima,
- c) broj sudionika (direktnih i indirektnih) koji su uključeni u projekat,
- d) vremenski rok za provođenje aktivnosti na realizaciji projekta,
- e) osigurana saradnja sa drugim nivoima vlasti i međunarodnim organizacijama.

Član 6.

(Bodovi)

(1) Bodovi po osnovu kriterija za bodovanje iz člana 5. stav (1) tačka a) ostvaruju se na sljedeći način:

- a) Za svakog člana porodičnog domaćinstva.....5 bodova.

(2) Bodovi po osnovu kriterija za bodovanje iz člana 5. stav (1) tačka b) ove odluke ostvaruju se na sljedeći način:

- a) podnosilac prijave i članovi porodičnog domaćinstva imaju prosječne ukupne mjesečne prihode domaćinstva do 1.000,00 KM, u posljednja tri mjeseca.....20 bodova,
- b) podnosilac prijave i članovi porodičnog domaćinstva imaju prosječne ukupne mjesečne prihode domaćinstva između 1.001,00 KM do 1.500,00 KM, u posljednja tri mjeseca.....15 bodova,
- c) podnosilac prijave i članovi porodičnog domaćinstva imaju prosječne ukupne mjesečne prihode domaćinstva između 1.501,00 KM do 2.000,00 KM, u posljednja tri mjeseca.....10 bodova.

(3) Pod članom porodičnog domaćinstva, u smislu ove odluke, podrazumijevaju se bračni drug, izvanbračni drug, očuh, maćeha, usvojitelj, staratelj, djeca i roditelji, unučad bez roditelja, braća i sestre, ako sa podnosiocem prijave žive u zajedničkom domaćinstvu.

(4) Ukupan mjesečni prihod u smislu stava (2) ovog člana čine prihodi koje članovi porodičnog domaćinstva ostvaruju po osnovu plaća i drugih primanja iz radnog odnosa; starosne, invalidske i porodične penzije, privredne, uslužne i druge djelatnosti i dopunskog rada, izuzev novčanih primanja po osnovu boračko-invalidske i socijalne zaštite.

(5) Bodovi po osnovu kriterija za bodovanje iz člana 5. stav (1) tačka c) ove odluke ostvaruju se na sljedeći način:

- a) doktor nauka ili završen treći ciklus visokog obrazovanja10 bodova,
- b) magistar nauka9 bodova,
- c) magistar specijalist ili završen drugi ciklus visokog obrazovanja8 bodova,
- d) visoka stručna sprema ili završen prvi ciklus visokog obrazovanja u četvorogodišnjem trajanju sa ostvarenih 240 ECTS bodova7 bodova,
- e) viša školska sprema ili završen prvi ciklus visokog obrazovanja u trogodišnjem trajanju sa ostvarenih 180 ECTS bodova.....6 bodova,
- f) V stepen stručne spreme5 bodova,
- g) srednja stručna sprema u četvorogodišnjem trajanju4 boda,
- h) srednja stručna sprema u trogodišnjem trajanju3 boda.

(6) U okviru kategorije stručna sprema, podnosilac prijave može ostvariti i dodatne bodove po osnovu školskih priznanja i to:

- a) učenik generacije srednje škole.....5 bodova,
- b) najviše priznanje univerziteta/Zlatna plaketa univerziteta.....10 bodova.

(7) Podnosilac prijave može ostvariti bodove samo po jednom od osnova iz stava (5) ovog člana.

(8) Ukoliko je podnosilac prijave ostvario bodove iz stava (6) ovoga člana, isti se dodaju bodovima ostvarenim po osnovu iz stava (5) ovoga člana.

(9) Bodovi po osnovu kriterija za bodovanje iz člana 5. stav (1) tačka d) ove odluke ostvaruju se na sljedeći način:

- a) dobitnik svjetskih renomiranih priznanja i nagrada u oblasti nauke, umjetnosti, sporta i kulture.....20 bodova,
 - 1) osvojeno prvo mjesto/nagrada5 bodova
(broj bodova ostvaren po ovom osnovu dodaje se bodovima ostvarenim po osnovu iz tačke a) ovog stava),
- b) doprinos kroz patente dokazane ili certificirane od strane ovlaštenih institucija.....20 bodova,
- c) dobitnik evropskih renomiranih priznanja i nagrada u oblasti nauke, umjetnosti, sporta i kulture.....15 bodova,
 - 1) osvojeno prvo mjesto/nagrada2 boda
(broj bodova ostvaren po ovom osnovu dodaje se bodovima ostvarenim po osnovu iz tačke c) ovog stava)
- d) dobitnik renomiranih priznanja u državnim okvirima u oblasti nauke, umjetnosti, sporta i kulture.....10 bodova,
 - 1) osvojeno prvo mjesto/nagrada.....1 bod,
(broj bodova ostvaren po ovom osnovu dodaje se bodovima ostvarenim po osnovu iz tačke d) ovog stava)
- e) objavljen udžbenik, odobren od nadležnih institucija za upotrebu u obrazovnim ustanovama:
 - 1) samostalno5 bodova,
 - 2) koautorstvo 2 boda.

(10) Maksimalan broj bodova koji podnosilac prijave može ostvariti po osnovu iz stava (9) tačka e) ovog člana iznosi 10 bodova.

(11) Pod renomiranim priznanjima i nagradama u oblasti sporta, u smislu ove odluke, podrazumijevaju se osvojena 1., 2. ili 3. mjesta na olimpijskim ili paraolimpijskim igrama, zvaničnim svjetskim ili evropskim prvenstvima organizovanim od strane krovnih međunarodnih asocijacija u odgovarajućoj oblasti sporta, te osvojeno 1., 2. ili 3. mjesto na zvaničnim međunarodnim i državnim takmičenjima organizovanim od strane međunarodnih i državnih saveza članica Međunarodnog olimpijskog komiteta ili Sport Accorda.

(12) Bodovi po osnovu kriterija za bodovanje iz člana 5. stav (2) tačka a) ove odluke ostvaruju se na sljedeći način:

- a) Za svako dijete predškolskog uzrasta koje koristi usluge predškolske ustanove.....10 bodova.
- (13) Bodovi po osnovu kriterija za bodovanje iz člana 5. stav (2) tačka b) ove odluke ostvaruju se na sljedeći način:
- a) Za svakog člana porodičnog domaćinstva.....5 bodova.
- (14) Bodovi po osnovu kriterija za bodovanje iz člana 5. stav (2) tačka c) ove odluke ostvaruju se na sljedeći način:
- a) podnosilac prijave i članovi porodičnog domaćinstva imaju prosječne ukupne mjesečne prihode domaćinstva do 1.000,00 KM, u posljednja tri mjeseca.....20 bodova,
- b) podnosilac prijave i članovi porodičnog domaćinstva imaju prosječne ukupne mjesečne prihode domaćinstva između 1.001,00 KM do 1.500,00 KM, u posljednja tri mjeseca.....15 bodova,
- c) podnosilac prijave i članovi porodičnog domaćinstva imaju prosječne ukupne mjesečne prihode domaćinstva između 1.501,00 KM do 2.000,00 KM u posljednja tri mjeseca.....10 bodova.
- (15) Ukupan mjesečni prihod u smislu stava (14) ovog člana čine prihodi koje članovi porodičnog domaćinstva ostvaruju po osnovu plaća i drugih primanja iz radnog odnosa; starosne, invalidske i porodične penzije, privredne, uslužne i druge djelatnosti i dopunskog rada, izuzev novčanih primanja po osnovu boračko-invalidske i socijalne zaštite.
- (16) Bodovi po osnovu kriterija za bodovanje iz člana 5. stav (2) tačka d) ove odluke ostvaruju se na sljedeći način:
- a) samohrani roditelj/staratelj.....10 bodova.
- (17) Bodovi po osnovu kriterija za bodovanje iz člana 5. stav (3) tačka a) ove odluke ostvaruju na sljedeći način:
- a) prema procjeni Komisije projekat se vrednuje u rasponu od.....0-20 bodova
- Napomena: projekti koji budu ocijenjeni sa 0 bodova se odbacuju.
- (18) Bodovi po osnovu kriterija za bodovanje iz člana 5. stav (3) tačka b) ove odluke ostvaruju se na sljedeći način:
- a) do tri realizovana projekta.....3 boda
- b) od četiri do šest realizovanih projekata.....5 bodova
- c) preko šest realizovanih projekata.....10 bodova
- (19) Bodovi po osnovu kriterija za bodovanje iz člana 5. stav (3) tačka c) ove odluke ostvaruju se na sljedeći način:
- a) projekat uključuje do trideset sudionika.....3 boda
- b) projekat uključuje od tridesetjedan do šezdeset sudionika.....5 bodova
- c) projekat uključuje preko šezdeset sudionika.....10 bodova
- (20) Bodovi po osnovu kriterija za bodovanje iz člana 5. stav (3) tačka d) ove odluke ostvaruju se na sljedeći način:
- a) vremenski rok za provođenje projektnih aktivnosti do mjesec dana.....2 boda
- b) vremenski rok za provođenje projektnih aktivnosti od dva do tri mjeseca dana.....4 boda
- c) vremenski rok za provođenje projektnih aktivnosti duži od tri mjeseca.....5 bodova
- (21) Bodovi po osnovu kriterija za bodovanje iz člana 5. stav (3) tačka e) ove odluke ostvaruju se na sljedeći način:
- a) do tri potpisana sporazuma o partnerstvima i saradnji.....3 boda
- b) od četiri do šest potpisanih sporazuma o partnerstvima i saradnji.....5 bodova
- c) preko šest potpisanih sporazuma o partnerstvima i saradnji.....10 bodova.

Član 7.

(Postupak raspodjele sredstava)

- (1) Sredstva za namjene iz člana 3. stav (1) ove odluke u iznosu od 15.000,00 KM (slovima: petnaest hiljada i 00/100 KM) dodjeljivaće se dobavljačima koji će pružati ugovorene i druge posebne usluge po postupku javne nabavke koje provodi Ministarstvo.

(2) Sredstva za namjene iz člana 3. stav (2) tačka a) ove odluke, u ukupnom iznosu od 210.000,00 KM (slovima: dvijestotinedesethiljada i 00/100 KM), dodjeljivaće se putem javnog poziva pojedincima u traženom iznosu, a maksimalan iznos ne može biti veći od 3.000,00 KM (slovima: trihiljade i 00/100 KM).

(3) Pojedinačni iznos sredstava na ime subvencioniranja kamata jednak je ukupnom iznosu kamate obračunate u 12 uzastopnih mjesečnih rata, počev od 01.06.2023. godine do 31.05.2024. godine.

(4) Sredstva za namjene iz člana 3. stav (2) tačka b) ove odluke, u ukupnom iznosu od 189.000,00 KM (slovima: stotinuosamdesetdevehiljada i 00/100 KM), dodjeljivaće se putem javnog poziva pojedincima u iznosu od 40% ukupnih godišnjih troškova za smještaj djeteta u predškolsku ustanovu, a maksimalan iznos ne može biti veći od 600,00 KM po djetetu (slovima: šeststotina i 00/100 KM).

(5) Godišnji troškovi za smještaj i boravak djece u predškolske ustanove jednak je ukupnom iznosu troškova koji su plaćeni u periodu od 01.09.2023. godine do 31.08.2024. godine.

(6) Sredstva za namjene iz člana 3. stav (3) ove odluke u ukupnom iznosu od 430.000,00 KM (slovima: četrjestotinetridest i 00/100 KM), dodjeljivati će se na sljedeći način:

a) Sredstva za namjene iz člana 3. stav (3) tačka a) ove odluke dodjeljivaće se putem javnog poziva u traženom iznosu, a maksimalan iznos ne može biti veći od 3.000,00 KM (slovima: trihiljade i 00/100 KM).

b) Sredstva za namjene iz člana 3. stav (3) tačka b) ove odluke dodjeljivaće se pojedinačnom odlukom Ministarstva uz prethodno podnesen zahtjev Vijeća mladih Kantona, nakon što sredstva dodijeljena u prethodnoj godini budu opravdana, a maksimalan iznos ne može biti veći od 20.000,00 KM (slovima: dvadesethiljada i 00/100 KM).

c) Sredstva za namjene iz člana 3. stav (3) tačka c) ove odluke dodjeljivati će se u ukupnom iznosu do 300.000,00 KM (slovima: tristotinehiljada i 00/100) u skladu sa potpisanim Ugovorom o partnerstvu između Ministarstva, Investicijske fondacije "IMPAKT", JU Službe za zapošljavanje Tuzlanskog kantona i lokalnih zajednica sa područja Kantona koje iskažu interes za učešće i realizaciju programa podrške poduzetništva mladih kroz IMPAK Inkubator poslovnih ideja na području Kantona. Minimalan iznos izdvajanja lokalnih zajednica koje iskažu interes za učešće u programu je 5.000,00 KM (slovima: pethiljada i 00/100). Investicijska fondacija IMPAKT se obavezuje na učešće sa minimalno 100.000,00 KM (slovima: stotinhiljada i 00/100) uz dodatnu obavezu objave Javnog poziva, stručnu i mentorsku podršku za poduzetničke poduhvate, koordinaciju i implementaciju cjelokupnog Programa i ostale obaveze definisane naknadno potpisanim Ugovorom o partnerstvu. Nakon potpisivanja Ugovora o partnerstvu Ministarstvo donosi Odluku o odobravanju finansijskih sredstava.

d) Sredstva za namjene iz člana 3. stav (3) tačka d) ove odluke dodjeljivati će se putem Javnog poziva u traženom iznosu, a maksimalan iznos ne može biti veći od 20.000,00 KM (slovima: dvadesethiljada i 00/100 KM).

(7) Troškovi koji se priznaju odnose se isključivo na direktne troškove nastale realizacijom aktivnosti za namjene utvrđene u članu 3. stav (2) i stav (3) tačke a) i d) ove odluke.

Član 8.

(Dodjela sredstava)

(1) Dodjela sredstava putem javnih poziva vršiti će se na osnovu rang listi, u iznosu traženom u prijavi maksimalno do iznosa utvrđenog u članu 7. ove odluke, do raspodjele ukupnih sredstava predviđenih za utvrđene namjene.

(2) Ukoliko pri raspodjeli sredstava posljednji rangirani ne može dobiti traženi iznos sredstava, traži se njegova pisana saglasnost da prihvati manji iznos, a ako ne prihvati manji iznos sredstava postupak se ponavlja sa sljedećim kandidatom sa liste.

(3) U slučaju jednakog broja bodova prednost na rang listi se daje podnosilac prijave koji je ostvario veći broj bodova prema redoslijedu kriterija iz člana 5. ove odluke.

(4) U slučaju jednakog broja bodova prednost na rang listi se daje podnosiocu prijave koji dolazi iz jedinice lokalne samouprave sa niži indeksom nivoa razvijenosti prema podacima Federalnog zavoda za programiranje razvoja.

(5) U slučaju jednakog broja bodova i nakon primjene kriterija iz stava (4) ovog člana, konačan prijedlog odluke za 2024. godinu donosi Komisija za odabir korisnika sredstava sa pozicije „Podrška mladima“ u 2024. godini (u daljem tekstu: Komisija).

Član 9.

(Način prijave i potrebna dokumentacija)

(1) Sredstava iz člana 3. stav (2) i stav (3) tačka a) i d) ove odluke se dodjeljuju putem javnih poziva za odabir korisnika sredstava sa pozicije „Podrška mladima“ u 2024. godini koji raspisuje Ministarstvo.

(2) Javni poziv se objavljuje na web stranicama Vlade Kantona: www.vladatk.gov.ba i Ministarstva: www.mksmtk.gov.ba (u daljem tekstu: web stranice Vlade i Ministarstva).

(3) Podnosilac prijave za sredstva koja se dodjeljuju za namjenu iz člana 3. stav (2) tačka a) ove odluke dostavlja prijavu na Javni poziv koja sadrži:

a) Popunjen i potpisan PRIJAVNI OBRAZAC, koji čini sastavni dio ove odluke i koji se može dobiti u Ministarstvu, putem web stranice Vlade i Ministarstva,

b) OBAVEZNU DOKUMENTACIJU

- 1) Uvjerenje o državljanstvu za podnosioca prijave ne stariji od 30 dana od dana objave Javnog poziva (original ili ovjerena kopija),
- 2) CIPS obrazac PBA3 za podnosioca prijave ne stariji od 30 dana od dana objave Javnog poziva (original ili ovjerena kopija) kojim se dokazuje da podnosilac prijave ima mjesto prebivališta na adresi nekretnine na koju se odnosi kupoprodajni ugovor. Napomena: izuzetak su nekretnine u izgradnji – podnosilac prijave čija je nekretnina u izgradnji dostavlja izjavu da u momentu podnošenja prijave nije dovršena izgradnja nekretnine koja je predmet kupoprodajnog ugovora (original) i CIPS obrazac PBA3 za podnosioca prijave po trenutnom mjestu prebivališta na području Tuzlanskog kantona ne stariji od 30 dana od dana objave Javnog poziva (original ili ovjerena kopija),
- 3) Izjavu ovjerenu kod nadležnog gradskog/općinskog organa ili notara da podnosilac prijave i punoljetni članovi domaćinstva koji su navedeni na kućnoj listi nisu nosioci stanarskog prava, vlasnici stana ili kuće, izuzev stana ili kuće koji je predmet prijave na koji se odnosi kupoprodajni ugovor (original),
- 4) Ugovor sa bankom o namjenskom kreditu za stambeno zbrinjavanje sa Planom otplate kredita (ovjerena kopija),
- 5) Potvrdu od banke da postoji uredna otplata kredita sa ukupnim iznosom plaćenih kamata za period od 01.06.2023. godine do 31.05.2024. godine, (treba da sadrži i sljedeće podatke: ime i prezime podnosioca prijave, JMBG i broj ugovora o stambenom kreditu) (original),
- 6) Izjavu podnosioca prijave ovjerenu kod nadležnog gradskog/općinskog organa ili notara da nije bio korisnik sredstava za stambeno zbrinjavanje i/ili subvencioniranje kamata za stambeno zbrinjavanje odobrenih iz Budžeta drugih nivoa vlasti za period od 01.06.2023. godine do 31.05.2024. godine (original),
- 7) Notarski obrađen ugovor o kupoprodaji stana ili kuće (original ili ovjerena kopija),
- 8) Potvrda od banke da račun nije blokiran iz koje se vidi broj transakcijskog računa, ne starija od tri mjeseca od dana objave Javnog poziva (original ili ovjerena kopija),
- 9) Dokaz o stručnoj spremi podnosioca prijave (diploma, uvjerenje, svjedodžba) (original ili ovjerena kopija). Napomena: Ukoliko se radi o inostranoj obrazovnoj ispravi, podnosilac prijave obavezan je uz ovjerenu kopiju iste dostaviti i odgovarajuće rješenje o nostrifikaciji, odnosno stručnom priznavanju, izdato od strane nadležnog Ministarstva,
- 10) Izjava – kućna lista ne starija od 30 dana od dana objave Javnog poziva (original ili ovjerena kopija),
- 11) CIPS obrazac PBA3 za sve punoljetne članove domaćinstva navedene na kućnoj listi, ne stariji od 30 dana od dana objave Javnog poziva (original ili ovjerena kopija)
- 12) Dokaz o visini prihoda za podnosioca prijave i sve punoljetne članove domaćinstvakoji su navedeni na kućnoj listi:

1. Potvrda poslodavca o mjesečnim primanjima za posljednja tri mjeseca od dana podnošenja prijave za sve zaposlene, odnosno Ček od PIO penzije za penzionisane punoljetne članove domaćinstva (original ili ovjerena kopija),
 2. Uvjerenje službe za zapošljavanje za sve nezaposlene članove domaćinstva ne starije od 30 dana od dana objave Javnog poziva (original ili ovjerena kopija), a ukoliko se isti ne vode na evidenciji službe za zapošljavanje Uvjerenje iz ispostave poreske uprave kao dokaz o statusu nezaposlenosti ne starije od 30 dana od dana objave Javnog poziva (original ili ovjerena kopija).
 3. za lica koja imaju registrovanu samostalnu djelatnost: rješenje o registraciji obrta/srodne djelatnosti, obrazac 2002 o plaćenim doprinosima, za posljednja tri mjeseca i GPD i SPR obrasci godišnje prijave za 2023. godinu;
- 13) Uvjerenje iz Poreske uprave za podnosioca prijave i punoljetne članove domaćinstva navedene na kućnoj listi o visini ostvarenog dohotka stečenog po osnovu samostalnih djelatnosti, imovine, imovinskih prava i kapitala u 2023. godini ne starije od tri mjeseca od dana objave Javnog poziva (original ili ovjerena kopija);

Neobavezna dokumentacija relevantna za bodovanje:

- 1) Dokaz o školskim priznanjima podnosioca prijave (učenik generacije srednje škole, najviše priznanje univerziteta/Zlatna plaketa univerziteta) (original ili ovjerena kopija);
- 2) Dokaz o postignutim rezultatima podnosioca prijave u oblasti nauke, umjetnosti, sporta i kulture-neobavezan dokument za dostavljanje (original ili ovjerena kopija). Dokaz izdat od strane Sportskog saveza BiH ili granskog sportskog saveza organizovan na nivou države mora da sadrži podatke iz kojih se vidi da je 1, 2. ili 3. mjesto osvojeno na Olimpijskim ili Paraolimpijskim igrama, zvaničnim svjetskim ili evropskim prvenstvima organizovanim od strane krovnih međunarodnih asocijacija u odgovarajućoj oblasti sporta, odnosno da je 1, 2. ili 3. mjesto osvojeno na zvaničnim međunarodnim i državnim takmičenjima organizovanim od strane međunarodnih i državnih saveza članica Međunarodnog olimpijskog komiteta ili Sport Accorda. Za uspjehe u oblasti nauke, umjetnosti i kulture dostavljaju se drugi relevantni dokazi koji ukazuju na tačnost tvrdnji u prijavnim obrascu.

(4) Podnosilac prijave za sredstva koja se dodjeljuju za namjenu iz člana 3. stav (2) tačka b) ove odluke dostavlja prijavu na Javni poziv koja sadrži:

- a) Popunjen i potpisan PRIJAVNI OBRAZAC, koji čini sastavni dio ove Odluke i koji se može dobiti u Ministarstvu, putem web stranice Vlade i Ministarstva,

b) OBAVEZNU DOKUMENTACIJU

- 1) Uvjerenje o državljanstvu za podnosioca prijave ne starije od tri mjeseca od dana objave Javnog poziva (original ili ovjerena kopija) ili ovjerena kopija važeće lične karte,
- 2) CIPS obrazac PBA3 za podnosioca prijave i za dijete koje boravi u predškolskoj ustanovi, ne stariji od 30 dana od dana objave Javnog poziva (original ili ovjerena kopija),
- 3) Izvod iz matične knjige rođenih za dijete koje boravi u predškolskoj ustanovi ili drugi dokaz kojim se dokazuje svojstvo roditelja/staratelja/zakonskog zastupnika (original ili ovjerena kopija),
- 4) Ugovor sa predškolskom ustanovom o smještaju i boravku djeteta u ustanovi (Ugovor treba da se odnosi na period 01.09.2023-31.08.2024. godine. Ukoliko postoje dva ili više ugovora za isto dijete koji se odnose na ovaj period potrebno je dostaviti sve ugovore koji se odnose na taj period) (original ili ovjerena kopija),
- 5) Potvrda predškolske ustanove sa kojom je potpisan Ugovor da nema neizmirenih obaveza prema ustanovi za period od 01.09.2023. godine do 31.08.2024. godine sa naznačenim ukupnim iznosom plaćenih troškova za navedeni period (treba da sadrži i sljedeće podatke: ime i prezime i JMBG podnosioca prijave i djeteta koje boravi u

- predškolskoj ustanovi a na koje se prijava odnosi, broj ugovora koji je potpisan sa predškolskom ustanovom za period od 01.09.2023. do 31.08.2024. godine) (original),
- 6) Izjavu ovjerenu kod nadležnog gradskog/općinskog organa ili notara da roditelji/staratelji/zakonski zastupnici nisu bili korisnici sredstava za namjene finansiranja/sufinansiranja troškova smještaja i boravka djece u predškolskim ustanovama odobrenih iz Budžeta drugih nivoa vlasti za period od 01.09.2023. godine do 31.08.2024. godine (original),
 - 7) Izjavu ovjerenu kod nadležnog gradskog/općinskog organa ili notara da roditelji/staratelji/zakonski zastupnici nisu ostvarili pravo na subvencioniranje troškova smještaja i boravka djece u predškolskim ustanovama putem mjesno nadležnih centara za socijalni rad i Ministarstva za rad, socijalnu politiku i povratak Tuzlanskog kantona u 2024. godini (original)
 - 8) Izjava – kućna lista ne starija od 30 dana od dana objave Javnog poziva (original ili ovjerena kopija);
 - 9) Dokaz o visini prihoda za podnosioca prijave i sve punoljetne članove domaćinstva koji su navedeni na kućnoj listi:
 1. Potvrda poslodavca o mjesečnim primanjima za posljednja tri mjeseca od dana podnošenja prijave za sve zaposlene, odnosno Ček od PIO penzije za penzionisane punoljetne članove domaćinstva (original ili ovjerena kopija),
 2. Uvjerenje službe za zapošljavanje za sve nezaposlene članove domaćinstva ne starije od 30 dana od dana objave Javnog poziva (original ili ovjerena kopija), a ukoliko se isti ne vode na evidenciji službe za zapošljavanje Uvjerenje iz ispostave poreske uprave kao dokaz o statusu nezaposlenosti ne starije od 30 dana od dana objave Javnog poziva (original ili ovjerena kopija).
 3. za lica koja imaju registrovanu samostalnu djelatnost: rješenje o registraciji obrta/srodne djelatnosti, obrazac 2002 o plaćenim doprinosima, za posljednja tri mjeseca i GPD i SPR obrasci godišnje prijave za 2023. godinu;
 - 10) Uvjerenje iz Poreske uprave za podnosioca prijave i punoljetne članove domaćinstva navedene na kućnoj listi o visini ostvarenog dohotka stečenog po osnovu samostalnih djelatnosti, imovine, imovinskih prava i kapitala u 2023. godini ne starije od tri mjeseca od dana objave Javnog poziva (original ili ovjerena kopija);
 - 11) Samohrani roditelj/staratelj/zakonski zastupnik dostavlja dokumentaciju kojom dokazuje status samohranog roditelja (Izvod iz matične knjige rođenih za roditelja (original ili ovjerena kopija) ili druga dokumentacija kojom se dokazuje status samohranog roditelja),
 - 12) Dokaz o broju tekućeg računa podnosioca prijave (kopija ugovora sa bankom ili potvrda banke).

(5) Podnosilac prijave za sredstva koja se dodjeljuju za namjenu iz člana 3. stav (3) tačka a) i d) ove odluke dostavlja prijavu na Javni poziv koja sadrži:

- a) **PRIJAVNI OBRAZAC** (popunjen, potpisan i ovjeren pečatom), koji čini sastavni dio ove odluke i koji se može dobiti u Ministarstvu, web stranice Vlade i Ministarstva,
- b) **OBRAZAC PRIJEDLOGA PROJEKTA** (popunjen, potpisan i ovjeren pečatom), koji čini sastavni dio ove odluke i koji se može dobiti u Ministarstvu, putem web stranica Vlade i Ministarstva,
- c) **OBAVEZNU DOKUMENTACIJU**
 - 1) Aktuelni izvod iz registra udruženja koje vodi Ministarstvo pravosuđa i uprave Tuzlanskog kantona ili izvod iz registra fondacija koje vodi Federalno ministarstvo pravde, ne stariji od tri mjeseca od dana objave Javnog poziva (original ili ovjerena kopija);
 - 2) Uvjerenje o poreskoj registraciji (original ili ovjerena kopija);
 - 3) Potvrda od banke da račun nije blokiran iz koje se vidi broj transakcijskog računa, ne starija od tri mjeseca od dana objave Javnog poziva (original ili ovjerena kopija);
 - 4) Bilans stanja i bilans uspjeha sa vidljivim pečatom FIA za nevladine organizacije registrovana do 31.12.2023. godine (ovjerena kopija);
 - 5) Program rada za 2024. godinu,

- 6) Projekat kojim omladinsko udruženje odnosno nevladina organizacija aplicira za dodjelu sredstava, s jasno definiranim ciljevima, ciljnim grupama, brojem sudionika (direktnih/indirektnih koji su uključeni u projekat, očekivanim rezultatima, aktivnostima, detaljnom specifikacijom troškova, vremenskim rokom provođenja aktivnosti na realizaciji projekta, načinom praćenja realizacije projekta (vrednovanje i mjerenje zadovoljstva korisnika, održivost projekta, te na koji način će podnosilac prijave informisati javnost o aktivnostima realizacije projekta);
 - 7) Za projekat koji se provodi u školama dostaviti pisanu saglasnost direktora škole odnosno nadležnog ministarstva;
 - 8) Dokaz o realizovanim projektima, u oblasti mladih, iz prethodnog perioda, bez obzira na to od koga su sredstva dobivena (mogu se dostaviti potvrde o realizovanim projektima izdatim od strane finansijera, fotografije, članci, štampani materijal, propagandni materijal);
 - 9) Dokaz da je omladinsko udruženje upisano u spisak omladinskih udruženja jedinice lokalne samouprave sa sjedištem omladinskog udruženja na području Tuzlanskog kantona (dostavljaju samo omladinska udruženja);
- d) DODATNU DOKUMENTACIJU (za projekte omladinskih udruženja dodatna dokumentacija se dostavlja ukoliko je podnosilac prijave posjeduje, a nevladine organizacije za projekte koji proizilaze iz strateških dokumenata su obavezne dostaviti dodatnu dokumentaciju)
- 1) Potpisani sporazumi o partnerstvima i saradnji (original ili ovjerena kopija);
 - 2) Potpisan ugovor o sufinansiranju ili drugi dokaz o sufinansiranju projekata-odluka i sl. (original ili ovjerena kopija).

Član 10.

(Razmatranje prijave i način dodjele sredstava)

(1) Postupak razmatranja prijave za raspodjelu sredstava za namjene iz člana 3. stav (3) tačka a) i d) ove odluke provodi Komisija od tri člana koju imenuje Ministar za kulturu, sport i mlade (u daljem tekstu: Ministar) iz reda zaposlenika Ministarstva, predstavnika Vijeća mladih Kantona i lica sa dugogodišnjim iskustvom u radu sa mladima, te dva zamjenska člana, od kojih je jedan iz reda zaposlenika Ministarstva, a jedan predstavnik Vijeća mladih Kantona i lica sa dugogodišnjim iskustvom u radu sa mladima.

(2) Postupak razmatranja prijave za raspodjelu sredstava za namjene iz člana 3. stav (2) tačka a) i b) ove odluke provodi jedna ili više komisija od tri člana koju imenuje Ministar iz reda zaposlenika Ministarstva.

(3) Po ukazanoj potrebi Komisija može zatražiti konsultacije eksperata iz datih oblasti, dodatno pojašnjenje od nadležnih organa ili od strane prijavljenog.

(4) Komisija razmatra prispjele prijave u pogledu ispunjavanja uslova, vrši bodovanje prijave prema kriterijima iz ove odluke i sačinjava Preliminarnu rang listu korisnika sredstava sa pozicije „Podrška mladima“ za 2024. godinu i Preliminarnu listu kandidata čije su prijave neuredne, neblagovremene, nepotpune i neosnovane za dodjelu sredstava sa pozicije „Podrška mladima“ za 2024. godinu. Preliminarne liste se objavljuju na web stranicama Vlade i Ministarstva.

(5) Na objavljene liste svi kandidati imaju pravo prigovora u roku od pet dana od dana objavljivanja listi na web stranicama Vlade i Ministarstva, a koji se podnosi Ministarstvu u pisanoj formi i o istom odlučuje Ministar u roku od 8 dana od dana isteka roka za podnošenje prigovora.

(6) Nakon rješavanja po uložnim prigovorima, Ministar donosi Konačnu rang listu korisnika sredstava sa pozicije „Podrška mladima“ za 2024. godinu, koja se objavljuje na web stranicama Vlade i Ministarstva.

(7) Na osnovu Konačne rang liste korisnika sredstava, Ministar će donijeti pojedinačne odluke o odobravanju finansijskih sredstava korisnicima, iznosima i namjeni finansijskih sredstava u okviru javnih poziva za odabir korisnika sredstava sa pozicije „Podrška mladima“ u 2024. godini.

(8) Sa omladinskim udruženjima i nevladinim organizacijama, kojima budu dodijeljena sredstva, Ministarstvo potpisuje pojedinačne ugovore i doznačava sredstva na njihov transakcijski račun.

Član 11.

(Izvjestavanje o utrošku sredstava)

(1) Korisnici sredstava iz člana 3. stav (3) tačka a) i d) ove odluke obavezni su dodijeljena sredstva koristiti namjenski i dužni su dostaviti izvještaj na propisanom obrascu „Format izvještaja“, koji je sastavni dio ove odluke, sa kompletnom dokumentacijom kojom se dokazuje namjenski utrošak sredstava najkasnije u roku od 30 dana od dana realizacije projekta odnosno 60 dana od dana uplate sredstava.

(2) Ministarstvo vrši nadzor namjenskog trošenja sredstava odobrenim korisnicima na osnovu dostavljenih izvještaja, a po potrebi i neposredno kod korisnika sredstava. Za tu namjenu kao polazište se koriste valjani izvori verifikacije navedeni u samoj prijavi.

(3) U slučaju nenamjenskog utroška sredstava, Ministarstvo pokreće postupak za vraćanje istih.

(4) Dokumentacija koja dokazuje namjenski utrošak sredstava su račun sa fiskalnim računom, ugovori, izvod sa bankovnog računa kao dokaz o plaćanju za definisane namjene sredstava, dokaz o izvršenoj uplati – uplatnica.

Član 12

(Preraspodjela neutrošenog iznosa sredstava)

U slučaju da se ne utroše predviđena sredstva po pojedinim namjenama iz člana 3. ove odluke, neutrošeni iznos se može preraspodijeliti za druge namjene utvrđene članom 3. ove odluke, za koje predviđena sredstva eventualno ne budu dovoljna.

Član 13.

(Nedostatak sredstava)


U slučaju nedostatka sredstava u Budžetu Kantona obustavlja se realizacija dodjele sredstava u potpunosti ili djelimično, srazmjerno nedostajućim sredstvima.

Član 14.

(Stupanje na snagu Odluke)

Ova odluka stupa na snagu danom donošenja i bit će objavljena u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A



PREMIJER KANTONA

Irfan Halilagić

Broj: 02/1-36-7042-1/24
Tuzla, 26.03.2024. godine